

Najukkani nerisassiarineqartut akiisa appartinneqarnissaannut, taamaalillunilu nunatsinni tunisassiarineqartut piumaneqarnerulernissaannut, naalakkersuinikkut sakkussaasinnaasut pillugit nassuiaasiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat kingusinnerpaamik UKA2026-p aallartinnginnerani saqqummiunneqarsimassaaq
Inatsisartunut ilaasortamit Mariane Paviassen Jensenimit saqqummiunneqartoq

pillugu

Aalisarnermut, Piniarnermut Nunalerinermullu Ataatsimiititaliap

siunnersuutip aappassaaneerineqarnissaanut

ISUMALIUTISSIISSUTAA

Ataatsimiititaliap suliarinninnermini inuttarai:

Inatsisartunut ilaasortaq Lars Poulsen, Siumut, siulittaasoq
Inatsisartunut ilaasortaq Jens NapätôK', Naleraq, siulittaasup tullia
Inatsisartunut ilaasortaq Jørgen Rosbach, Demokraatit
Inatsisartunut ilaasortaq Iddimangiiu Bianco, Inuit Ataqtigiiit
Inatsisartunut ilaasortaq Knud Kleemann, Atassut

UKA2025-mi 15. oktober siullermeerinninnerup kingorna ataatsimiititaliap siunnersuut misissorpaa. Siunnersuut imm. 89-imut, Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamut innersuunneqartumut, ataqtigiisillugu siullermeerneqarpoq.

Siunnersuutip imarisaa siunertaalu

Najukkami nerisassiarineqartut akiisa appartinneqarnissaasa aqqutissiuunnissaannut siunnersuuteqartup Naalakkersuisut peqquneqarnissaat siunnersuutigaa. Tamanna pissaaq naalakkersuinikkut sakkussaasinnaasut pillugit nassuiaasiornikkut, taassumalu UKA2026-p aallartinnginnerani saqqummiunneqarnissaanik Naalakkersuisut peqquneqarput.

Siunnersuutip Inatsisartunit siullermeerneqarnera

Naalakkersuisut allannguutissatut siunnersuut imaattoq siullermeerinninnermi saqqummiuppaat:

”Najukkani nerisassiarineqartut akiisa appartinneqarnissaannut, taamaalillunilu nunatsinni tunisassiarineqartut piumaneqarnerulernissaannut, Naalakkersuisut Imminut Pilersornermut Periusissiami suliaqarnermut naalakkersuinikkut sakkussaasinnaasut ilanngutissagaat Inatsisartunut aalajangiiffigisassaattut siunnersuutigaat”

Sammissaq matumani pineqartoq Inatsisartut ataatsimiittarfianni assigiinngitsunik sammivilimmik oqallisigilluarneqarpoq, taamaakkaluartoq najukkani nerisassiarineqartartut akiisa appartinneqarnissaannut aqutissiuisoqarnissaa isumaqatigineqarluni.

Naalakkersuisut allannguutissatut siunnersuutaat partiinit amerlanerussuteqartunit taperseerineqarpoq siunnersuullu aappassaaneerineqannginnermini Aalisarnermut, Piniarnermut Nunalerinermullu Ataatsimiititaliamit suliarineqaqqittussanngorlugu ingerlatinneqarluni.

Siunnersuutip aningaasaqarnikkut allaffissornikkullu kingunerisassai

Aalajangiiffigisassatut siunnersuutit piviusunngortinneqarneranni aningaasaqarnikkut allaffissornikkullu kingunerisassat siunnersuutip tunngavilersuutitaani nassuiaatigineqartassat Inatsisartut suleriaasianni § 33, imm. 1-imi allassimavoq.

Tamanna naapertorlugu siunnersuutip piviusunngortinneqarnerani aningaasaqarnikkut kingunerisassat AC-fuldmægtigit ukioq naallugu sulisorisamut ataatsimut 500.000 kr.-inik naapertuuttumik naleqartut siunnersuummi oqaatigineqartoq ataatsimiititaliamit maluginiarneqarpoq.

Allannguutissatut siunnersuut aningaasat taakku iluanni piviusunngortinneqarsinnaasoq ataatsimiititaliamit tagginnerqarpoq.

Ataatsimiititaliap siunnersuummut oqaaseqaatai

Najukkani nerisassiarineqartut akiisa appartinneqarnissaannut taakkulu piumaneqarnerulersinneqarnissaannut naalakkersuinikkut sakkussat Naalakkersuisut Imminut Pilersornermut Periusissiamik suliaannut Naalakkersuisut allannguutissatut siunnersuutaatigut ilanngunneqassat ataatsimiititaliamit aallarniutigalugu maluginiarneqarpoq. Akissuteqaat malillugu Kalaallit Nunaanni imminut pilersornermut 2026-mi 2,161 mio. kr.-it immikkoortinneqarnissat pilersaarutaavoq .

Qinigaaffimmi matumani akinik appaanissap anguneqarnissaa siunniunneqartoq Naalakkersuisut oqallittoqarnerani paasissutissiissutigaat. Innuttaasut sapinngisamik amerlanerpaat inuussutissanik najukkaneersunik pitsaasunik, peqqinnartunik pissarsisinnaanerisa pitsaanerulersinneqarnissaa aammalu innuttaasut kalaallit tunisassiaasigut inuussutissanik pilersuinerup isumannaatsuunerata pitsaanerulersinneqarnissaa Imminut Pilersornermut Periusissiaq 2025-2030-mi anguniarneqarpoq. Taamatuttaaq periusissiamut atatillugu pissutsit assigiinngitsut misissorneqarsimapput. Tamatumanilu paasineqarpoq

kalaallit nerisassiaat akikinnerugaluarpata amerlanerit piserusussagaluartut. Tamatuma saniatigut arlalinnik unammilligassaqartoq paasineqarpoq, soorlu nioqqutissanik ingerlasussanik piareersaaneq, assartuineq, umiarsualiviit, imermik innaallagissamillu pilersuinermi pissutsit. Kiisalu tunisassiortunut piumasaqaatinut tunngatillugu inatsisitigut allaffissornikkullu ilaatigut unammilligassaqarpoq.

Najukkani nerisassiat akiisa appartinniarneranni arlalinnik isiginiagassaqartoq ataatsimiititaliamit maluginiarneqarpoq, taakkunungalugu ilaapput assartuineq, tunisassiornikkut atortut, umiarsualiveqarneq, mittarfeqarneq kiisalu uuliamut, innaallagissamut imermullu aningaasartuuteqarneq. Aammattaaq ineriartortitsineq, nutaaliorneq aallarnisaanerlu najukkani nerisassiat akiinut appartitseqataasinnaasut ataatsimiititaliamit oqaatigineqassaaq. Tapiissuteqartarnerit akileraarutitigulluunniit iluaqutissat ilaat akinut taamatuttaaq apparsaaqataasinnaapput.

Najukkani nerisassiat nunalu tamakkerlugu nerisassat peqqinnartut tapersersorneqarnissaat taakkulu pisiarinissaannut periarfissat pitsanngorsarneqarnissaat pingaaruteqartoq ataatsimiititaliaq isumaqarpoq. Taamatuttaaq najukkami innuttaasut aaqqiissutaasinnaasunut peqataatinneqarnissaat pingaaruteqarpoq.

Ataatsimiititaliap inassuteqaatai

- Ataatsimiititaliami amerlanerussutillit Demokraatineersut, Inuit Ataqaatigiinneersut, Siumumeersut aamma Atassummeersut Naalakkersuisut allannguutissatut siunnersuutaat akuerineqassasoq inassuteqaatigaat.

Taamatuttaaq Kalaallit Nunaanni imminut pilersornerup ineriartortinneqarnissaanut 2026-mi 7,3 mio. kr.-inik immikkoortitseqqullugit Naalakkersuisut ataatsimiititaliamit kaammattorneqarput, tamanna Naalakkersuisut pilersaarutaannut ilaareermat.

Ataatsimiititaliap taama oqaaseqaateqarluni isumaliutissiisummilu allassimasutut paasinnil-
luni inatsisissatut siunnersuut aappassaanigassanngortippaa .

Lars Poulsen
Siulittaasoq

Jens Nap̃tôK'
Siulittaasup tullia

Jørgen Rosbach

Iddimanngiiu Bianco

Knud Kleemann